

Temp de eleziogn a Souramont

Nte l Veneto se vota domenia 31 de mai per l nuof president e per l nuof consilio regional. Nte i trei comugn da Souramont demà a Col se votarà incia per renovà l capocomune e l consilio de comun



Domenia 31 de mai nte l Veneto sarà le eleziogn regionale. (Foto: www.irpinianews.it)

Eleziogn - Domenia 31 de mai la jent dei trei comugn ladign da Souramont sarà ciamada a votà per le eleziogn regionai e, a Col, incia per le comunai. Sto an se podarà votà demà nte la giornada de domenia 31 da le 7 da doman fin le 23.00. Se regorda che per votà l é debujegn de avé daré n document de identità e la tessera elettorai; se valgugn l'avesse parduda o avesse da la mudà, se regorda che nte la giornada de domenia 31 duc i ufizi comunai sarà davarc per permete l renovament de la medema. Per le eleziogn regionai, l eletor ciaparà na sola zetola e sarà trei i modi derc per podé votà: a) l eletor metarà na cros sul simbol de lista

e/o sul inom del president che l vol votà; b) l eletor metarà na cros sul simbol de lista e/o sul inom del president che l vol votà e, se l vol, l podarà incia dà na preferenza per na lista provinciala che é colegada a chela regionala che l à votà; se l vol, l eletor podarà mete incia demà na cros sul simbol de la lista provinciala e l voto jirà nte l medemo temp siebe a chela che a chela regionala colegada; c) l eletor metarà na cros sul simbol de lista e/o sul inom del president che l vol votà e, se l vol, l podarà incia dà na preferenza a na lista provinciala che no é liada al grop regional che l à votà (chesta ven ciamada "votazion desliada"). Per le liste provincialai se podarà scrive

ite l inom de n candidat consilier. Per chel che revarda le eleziogn comunai, l eletor ciaparà na zetola con reportai i simbui de le trei liste. L eletor avarà da mete na cros sul simbol de la lista e/o sul inom del candidat a capocomune che l vol votà e sot l ciatarà na larch per scrive l inom de n candidat consilier.

I resultac de le regionai sarà ufiziai nte la not nanter domenia e lunes; per le comunai sarà invece da spetà l darèmesdì de lunes 1 de jugn.

Per chi che fose interessai, se pol ciatà maor informaziogn su le votaziogn de domenia 31 de mai al link: <http://elezioni.regione.veneto.it/>. (Giulia Tasser)